

## 每週經課朗誦經文(巴克禮漢羅/教羅)2012/09/30

### 共同經課 - 1 以斯帖記七章一節~六節、九節~十節、九章二十節~二十二節

1 王 kap Hap-bān 來赴王后以斯帖 ê 筵席。2 Chit-ê 第二日王 tī 酒筵席 ê 中間 koh 問以斯帖講，王后以斯帖 ah，你所請是甚麼？beh hō 你；你所求是甚麼？就國 ê 一半也 beh 做成伊。3 王后以斯帖應講，王 ah，我若得 tiòh 恩典 tī 你 ê 目矚前，王若掠做好，就願你允我所請，用我 ê 性命 hō 我，允我 ê 所求，用我 ê 宗族 hō 我；4 因為我 kap 我 ê 宗族受賣，beh 剿滅，thài 死阮，hō 阮死無；設使賣阮做奴僕做奴婢，雖然對敵 boē 會補王 ê 損失，我也靜靜。5 A-hap-sùi-ló 王應王后以斯帖講，敢存心做 chit-ê 事 ê 是 chī-chūi？hit 人 tī toh 落？6 以斯帖講，仇讎對敵就是 chit-ê phái<sup>n</sup> 人 Hap-bān。Hap-bān tī 王 kap 王后 ê 面前就真驚。9 伺候王 ê 太監有一個，名叫 Hap-pho-ná，講，看 ah，Hap-bān 為 tiòh Bók-tí-kái khiā 一個五十肘高 ê 柴架；Bók-tí-kái 就是前日用盡忠 ê 話報王 ê；ta<sup>n</sup> hit-ê 架 khiā tī Hap-bān ê 家。王講，吊伊 tī hit 頂面。10 人就吊 Hap-bān tī 伊 kā Bók-tí-kái 所備辦 ê 柴架頂。王 ê 受氣 chiah soah。20 Bók-tí-kái 記載 hiah-ê 事，koh 寫 phoe hō A-hap-sùi-ló 王 tak 省遠近所有 ê 猶大人，21 定 tiòh in tak 年 tiòh 守 A-tát 月十四十五兩日；22 Chit 兩日是猶大人脫離對敵得 tiòh 平安 ê 日；hit 月是憂悶變做歡喜，悲哀變做好 ê 日；也 tiòh 守 chit 兩日做設筵席歡喜，大家用禮物相送，賑濟 sòng-hiong 人 ê 日。

### 共同經課 - 2 詩篇一百二十四篇

1 上崎 á ê 詩；大衛所做。1) 以色列 ta<sup>n</sup> tiòh 講，若 m̄ 是耶和華贊阮，2 若 m̄ 是耶和華贊阮，Tī 人起來攻擊阮，3 Tī in 對阮發受氣 ê 時，就將阮活活吞落去；4 Hit 時 chiah-ê 水的確 poā<sup>n</sup> 過阮，河水的確淹密阮。5 凶狂 ê 水的確淹密阮。6 願耶和華受 o-ló，因為伊無將阮做食物，交 hō in pō-食。7 阮 ê 性命親像鳥 á，脫離掠鳥-ê 羅網；羅網破裂，阮就脫離。8 阮得 tiòh 幫贊，是靠耶和華 ê 名，伊是創造天地 ê。

### 共同經課 - 3 雅各書五章十三節~二十節

13 Lin 中間有人受苦 mah？伊 tiòh 祈禱。有人歡喜無？伊 tiòh 吟詩。14 有人破病無？伊 tiòh 叫教會 ê 長老，tī 主 ê 名用油抹伊，近 oá 伊來祈禱。15 有信 ê 祈禱 beh 救破病 ê 人，主 beh hō 伊起來：伊若有罪，beh 赦免伊。16 Lin tiòh 相對認罪，相替祈禱，thang 得 tiòh 醫好。義人 ê 祈禱，伊 ê 力量有大功效。17 以利亞是 kap 咱同情 ê 人，伊切切求莫得落雨，就無落雨 tī 地裡歷過三年 koh 六月日。18 伊 koh 祈禱，天就落雨，地就出土產。19 我 ê 兄弟 ah，lin 中間若有失迷真理 ê，有人 hō 伊 oát-tng，20 thang 知 hō 一個罪人 tùi 迷路 tò-tng ê，能救伊 ê 靈魂出死，koh 能遮蓋 choē-choē 罪過。

### 共同經課 - 4 馬可福音九章三十八節~五十節

38 約翰 kā 耶穌講，先生，阮 bat 看見一人用你 ê 名趕鬼；阮就禁止伊，因為伊無 tè 咱。39 耶穌講，莫得禁伊，因為無有人奉我 ê 名行權能，也會 liām-pi<sup>n</sup> 謾謗我。40 見若無攻擊咱 ê 就是為咱。41 見若因為 lín 屬基督，就用一杯水 hō lín lim ê，我實在 kā lín 講，伊將來無失落伊 ê 賞。42 見若 hō chiah-ê 信我 ê 微細 ê 一個去犯罪，hit 人寧可受大石磨縛伊 ê 領頸，hiat tī 海裡。43 設使你一手致到你犯罪就 tiòh 斬斷伊；你寧可破相入 tī 活，莫得兩手去地獄，入 boē hoa ê 火。44-45 設使你一腳致到你犯罪，就 tiòh 斬斷伊；你寧可跛腳入活，莫得兩腳受 hiat 落地獄。46-47 設使你一目致到你犯罪，就 tiòh 削去；你寧可一目入 tī 上帝 ê 國，莫得兩目 hiat 落地獄；48 tī hia in ê 蟲無死，火無 hoa。49 因為 tak 人 beh 用火來 sī<sup>n</sup> 伊。50 鹽是好；鹽若失落伊 ê 鹹，beh 用甚麼來復到伊 ê 味？Lin ê 內面應該 tiòh 有鹽；也大家 tiòh sa<sup>n</sup> 和好。